

pretatur ibi glossa, et in c. *Cum virum*, de Regular., et colligitur ex illo textu, si attente ponderentur illa verba: *Habitum religionis induens benedictionem accepit*. Quod etiam notavit gloss., in c. *Addidistis*, 20, q. 1. Idemque dicendum est ad Isidorum, quamvis textus ille non habeat tantam auctoritatem, tum quia sit privati doctoris, tum etiam quia etiam in ipso Isidoro inventus non est, ut in Codice Gregoriano notavi. Idem dicendum est ad Concilium Wormat., sub Gregorio III, quanquam testimonium illud speciale habeat difficultatem, quia expresse querit an licet his infantibus oblatis egredi et matrimonio copulari, postquam pubertatis annos impleverint; et respondet: *Hoc omnino deritamus*. Significat ergo nullam eis relinqui optionem, quando pervenient ad annos pubertatis. Et auget difficultatem ratio que subditur, *quia nefas est ut oblatis a parentibus Deo filiis voluptatis fræna laxentur*. Ubi non redditur causa ex consensu et ratihabitione filii, sed præcise ex oblatione paterna, cui contraire nefas censemur. Nihilominus priora etiam verba intelligenda sunt hoc modo, ut post completam puberem ætatem, verbi gratia, decimum quartum ætatis annum jam non liceat filio oblati retrocedere, quia perseverando in illo statu toto tempore usque ad pubertatem completam, et non reclamando cum primum illam implevit, satis videtur rata habuisse oblationem paternam; quia vero Marcellus Papa statuit, ut in decimo quinto ætatis anno a prælatis interrogentur, an velint permanere necne, existimo non fuisse hoc revocatum a Gregorio, sed ita semper fieri debuisse; ideoque cum Gregorius dixit: *Postquam impleverint pubertatis annos*, vel supponere etiam interrogationem illam jam factam, et pueri electionem, vel certe addidisse, etiamsi interrogatio illa prætermissa fuisset, per solam perseverantiam usque ad adultam ætatem completam, tacite censeri confirmatam oblationem. Atque ita etiam exposuit ibi glossa; fortasse tamen Marcellus loquitur, quando professio tantum sit tacita, nam tum necesse est ut post puberlarem completam annus integer transeat, quod etiam nunc observatur, juxta c. 1 de Regular., 6, ut infra videbimus. Alia vero jura, quæ solum requirunt annum pubertatis completum, intelligenda erunt quando fit expressa professio, et ad eundem sensum accommodata est ratio textus; nam, licet in hoc negotio multum deferatur reverentiae debitæ parentibus, nunquam excludi-

tur id quod ex parte filii necessarium est ut non possit licite retrocedere, scilicet, proprius consensus in ætate sufficienter adulta. Eadem responsio datur ad Concilium Triburiense, quæ fundari potest in illis verbis ejus: *Et in Ecclesia caput canere et legere*, ubi glossa advertit, ideo esse posita, quia non solum verbis, sed etiam factis propria declaratur voluntas. Denique historia illa Roberti apud D. Bernardum ex una parte videtur multum augere difficultatem, ex alia non videtur ad præsentem quæstionem pertinere, cum ibi non fuerit oblatio, ut ita dicam, consummata, sed solum promissa, et religionis habitu nondum accepto; in quo casu nullus hactenus dixit quempiam fieri religiosum per solam parentis promissionem, et ita relinquitur difficultas communis in omni opinione. Videtur ergo mihi Pontificem in eo casu voluisse confirmare secundam professionem, non quia prima valida non fuisset in Cisterciensi ordine, nec quia per solam parentis oblationem filius factus esset monachus Cluniacensis; sed solum quia aliquod jus illi fuerat acquisitum ad tales personam, unde accedente postea illius consensu per professionem jam ibidem factam, merito noluit Pontifex aliam mutationem fieri, maxime cum status esset fere æqualis, et ad bonum ipsius religiosi præcipue ordinatus; et si quis intercesserat defectus, facile poterat per ipsum summum Pontificem suppleri.

14. *Assertio ultima*. — *Probatur primo ex jure*. — *Secundo probatur ratione*. — Ultimo addendum est in hac quæstione, hunc liberum consensum necessarium esse non solum ex parte religiosi, sed etiam ex parte religionis; ita sentiunt Doctores omnes supra citati, et specialiter videri potest Panor., in c. *Porrectum*, de Regular., n. 10, et in c. *Consulti*, eodem tit.; et Navar., consil. 26, de Regular., n. 1; et Gregor. Lopez, in l. 7, tit. 7, p. 4; et colligitur aperte ex c. *ad Apostolicam*, de Regularib. Ubi ad valorem professionis requirit Innocentius III tam liberam acceptationem ex parte religionis, quam oblationem ex parte religiosi. Et in c. *Porrectum*, eod. tit., dicitur professionem regularem fieri, ex qua convertendo votum emititur, et recipitur ab Abbatе, quod ibi etiam glossa ita intelligit. Ratio autem est manifesta ex dictis juribus, et ex supradictis de ingressu religionis, et de traditione quæ in professione fit. Nam ex his omnibus habetur professionem religionis includere pactum quoddam inter religiosum et religionem; tum quia omnis donatio, quatenus requirit acce-

ptationem alterius, est pactum quoddam; tum etiam quia, ut Navarrus supra dixit, professio est contractus quidam obligatorius ex parte religionis et religiosi, quia religiosus se obligat monasterio ad serviendum ei secundum regulam, monasterium autem ad tractandum eum secundum regulam; ergo tam est necessarius liber consensus ex parte religionis, quam ex parte ipsius religiosi. Neque in hoc difficultas ulla occurrit.

15. *Notandum*. — Hinc vero a fortiori sequitur, necessariam esse potestatem in recipiente seu acceptante professionem, quia parum conductet consentire, nisi persona, quæ nomine religionis consensum præbet, ad hoc habeat potestatem, quia alias non haberet consensum efficacem. Occurrebat tamen statim quæstio, apud quem sit hæc potestas. Sed hæc eodem modo expedienda est, quo aliam similem supra resolvimus de potestate recipiendi ad habitum religionis.

## CAPUT IV.

UTRUM AD VALOREM PROFESSIONIS NECESSARIUS SIT CONSENSUS ITA LIBER, UT NON EX METU TRIBUATUR.

1. *Notatio et assertio simul*. — *Notatio secunda*. — Quoniam ea, quæ ex metu vel ignorantia fiunt, simpliciter libera et voluntaria sunt, quamvis secundum quid sint involuntaria, et coacta, ideo inquirendum relinquitur, an professio ita debeat esse perfecte libera, ut has etiam imperfectiones excludat; prius ergo dicemus de metu, et deinde de ignorantia. Circa metum autem considerandum est, non esse quæstionem, quando quis ex metu profitetur exterius, interius vero non consentit, sed solum fingit; nam tunc certum est professionem apud Deum esse nullam, quia sine voluntate et intentione profitendi non potest valida esse professio, secundum omnes, ut dixit Navarrus, cons. 15, de Regular., et per argumentum a simili sumitur ex c. *Tua*, et c. *Ie qui*, de Sponsalib.; et consonat sententia Gregorii in c. *Humanæ aures*, 22, q. 1, quod homines verba nostra talia judicant, qualia foris sonant; divina vero judicia talia ea audiunt, qualia ex intimis proferuntur, et supra tractando de voto in genere hoc latius probatum est. Unde ad hoc non refert quod timor sit magnus vel parvus; imo absolute non refert ex qua causa proveniat defectus consensus;

sed sufficit illum non esse, ut actus sit invalidus, sive ex metu gravi, aut levi, sive ex alia prava intentione, aut malitia non habeatur; quicumque enim ratione id contingat, illo deficiente, deficit anima contractus, ut sic dicam, et ideo nihil fit. Solum poterit conferre consideratio cause ad explicandum quæ obligatio manere possit in eo qui ita fixit, vel ad iterandam valide professionem cum vero consensu, vel ad aliquod damnum resarcendum. De qua re nonnulla diximus tractando de voto in genere, et in sequentibus aliquid fortasse attingere necessarium erit.

2. *In quo sensu procedat difficultas*. — *Ratio dubitandi*. — Quæstio ergo hujus loci est, quando quis profitendo verum consensum interius præbet, extortum tamen per metum, an revera professio valeat, verumque religiosum constituat. Et ratio dubitandi esse potest, quia ille tandem simpliciter vult se tradere religioni, et obligari Deo; ergo facit quod vult, nam potestem habet, cum sit dominus sui; nam qui potest et simpliciter vult, voluntum facit; in hoc enim distinguitur absoluta voluntas, quæ etiam efficax dicitur, a voluntate inefficaci.

3. *Conclusio vera et certa*. — *Probatur ex jure*. — Nihilominus res certa est talem professionem nullam esse. Quod docent omnes Doctores super jura statim citanda; et Sot., lib. 7 de Just., q. 2, art. 1, ad 2, et in 4, d. 29, q. 1, art. 3; et Navar., Comment. 4, de Regular., n. 76, et consil. 9, de His quæ vi, ubi duo fundamenta generalia assumit: unum est, nullum votum factum ex gravi metu validum esse, juxta gloss., in c. *Abbas*, de His quæ vi; aliud est, nullum actum metu factum ligare agentem in conscientia, juxta communem opinionem Hostiens., Adrian., et aliorum quos ibi refert, et seipsum etiam citat in Manual., c. 27, num. 29 et 30. Sed ibi nihil dicit de hoc tam generali principio, et in cap. 22, num. 50, contrarium principium statuere videtur; illud etiam generale principium de voto nobis supra probatum non fuit. Probatur ergo primo ex cap. 1, de His quæ vi, etc., ibi: *Si legitime probatu n fuerit non timore mortis prædictam mulierem religionem intrasse, aut quod fecit, postmodum ratum habuisse*; ergo si professio fuisset facta ex metu, et postea libere confirmata seu rata habita non fuisset, valida non estimaretur; et in cap. *Cum dilectus*, eod. tit., cum proposita est quæstio de voto quodam servandi regulam Cisterciensem et per violentiam facto, respondet Ponti-

sex servandum esse, non obstante violentia, quæ proponebatur jurata, cum neque metum mortis, neque cruciatum corporis contineret, et ideo non debuerat cadere in constantes; ergo si metus fuisse gravis, et cadens in constantem virum, votum non obligaret, juxta mentem Pontificis. Confirmari etiam hoc potest ex aliis juribus irritantibus matrimonium metu factum, cap. *Significavit*, de Eo qui duxit in matrim., etc., cap. *Veniens*, 1, cap. *Locum*, de Sponsalibus; item quia electio facta ex metu nulla est, cap. *Ubi periculum*, § *Caterum*, de Electione, in 6. Quæ exempla convincerent, si in illis casibus actus essent invalidi ex natura rei, quia non minor libertas requiritur ad professionem, quam ad illos actus. Tamen si illi actus solum sunt irriti jure positivo, non est tam efficax argumentum; est tamen optima congruentia, seu conjectura, idem in præsenti casu fieri debuisse.

4. *Dubitatio an talis professio sit nulla ex natura rei, vel ex jure positivo.* — *Prima opinio.* — *Fundamentum illius.* — *Confirmatio.* — Ut autem rationem hujus veritatis reddamus, inquirendum superest an talis professio sit irrita ex natura rei, vel ex jure positivo. Quidam censuit ex natura rei esse tale votum invalidum, quod indicat *Soto supra*, et idem sentit, lib. 8 de *Justitia*, q. 1, art. 7, versus finem. Idem tenet *Philiarch.*, lib. 3, c. 48, tom. 1; *Navar.*, dict. comment. 4, de *Regular.*, idem sentire videtur, cum solum argumentetur a simili, vel etiam a fortiori, quia professio maxime ligat, et ideo perfectam libertatem requirit. Idem plane sentit *Panormitanus*, in c. *Sicut nobis*, de *Regularibus*, n. 5, de cuius opinione plura statim. Hoc ergo est fundamentum præcipuum hujus sententiae, quod ita amplius explicari potest; nam professio primario fit ipsi Deo, cui se homo obligat, et principaliter tradit; ergo non est verisimile Deum acceptare traditionem sibi factam coacte; est ergo invalida ex natura rei. Accedit maxime, quia si ex natura rei professio non est invalida, neque ex jure positivo erit, quia nullum est jus positivum expressum, in quo talis irritatio fiat. Nam priora capita, quæ de votis specialiter loquuntur, hoc non statuunt, sed ad summum supponunt, et non satis clare, ut statim dicam. Alia vero jura, quæ non in hoc casu in specie, sed in aliis loquuntur, non sunt efficacia, ut dixi.

5. *Secunda opinio.* — *Fundamentum illius.* — Aliorum vero sententia est, professionem non esse irritam jure naturæ. Sed quidam ex

illis propter argumentum proxime factum dicunt consequenter talem professionem in conscientia validam esse, et obligare, quamvis Ecclesia non cogat ad illam servandam. Ita tenet *Sylv.*, verb. *Metus*, q. 8: *Quia nullibi (inquit) authentice legi talem irritationem.* Citatque Abbatem, in c. *Cum locum*, de Sponsalibus. Sed pro Cardinali citavit Abbatem, nam Cardinalis id asserit, non vero Abbas. Idemque *Sylvest.*, verb. *Votum*, 2, q. 12, in contrarium citat *Panormit.*, in c. *Sicut nobis*, de *Regularibus*, et merito, quia ibi, n. 5, et aliis locis, tenet votum metu factum irritum esse, ut patet ex c. *Abbas*, de His quæ vi, etc., numero undecimo. Præter *Sylvestrum* ergo nullum auctorem invenio hujus sententiae. Suaderi autem potest, quia si professio hæc non est nulla ex natura rei, oportet legem canonicaem, irritantem actum adeo gravem, esse expressam; non autem ita est; nam in c. 1, de His quæ vi, id non exprimitur, præcipit enim ibi Pontifex ut quedam mulier per censuram ecclesiasticam compellatur professionem servare, nisi legitime probetur factam esse per metum. Ex quo imprimis directe non habetur quid esset agendum, si constaret intervenisse metum; deinde ad summum colligi potest tunc non esse aliquem compellendum ad servandam professionem, non vero sequitur illum non teneri in conscientia ad illam servandam. Multoque minus probat c. *Cum dilectus*, in quo non est sermo de professione religiosis, sed de quodam voto simplici, seu promissione jurata, quam non dicit Pontifex futuram invalidam, si metus fuisse gravis, sed colligi fortasse potest, quod hinc fuisse irritanda, quod Pontifex noluit tunc facere, quia metus non fuit gravis.

6. *Vera resolutio duas partes amplectens.* — *Probatur prima pars.* — *Confirmatur.* — *Rejicitur Panormitanus.* — Nihilominus dicendum censeo, talem professionem esse validam ex natura rei, jure tamen ecclesiastico irritam esse. Hæc sententia sumitur ex *Navar.*, in *Summa*, c. 22, n. 50, et aliis qui de matrimonio ita sentiunt; et insinuat etiam *Soto*, in 4, d. 29, q. 1, art. 3, ad 4. Eamdem expresse ex recentioribus docent *Sanchez*, in *Decal.*, lib. 4, c. 3, n. 9; *Aragon.*, 2, 2, q. 88, a. 3; *Henr.*, lib. 1 de *Matrim.*, c. 9, n. 1 et 3; et *Less.*, lib. 2, c. 40, dubit. 3, n. 18, quatenus asserit gravem ac injustum metum solo jure positivo irritum reddere votum. Idem tradit c. 41, dubit. 7, n. 61, de professione, estque hæc sententia frequentius recepta in scholis. Et quoad

priorem partem mihi sufficienter probatur rationibus, quibus idem in superioribus ostendi, lib. 1 de *Voto in communi*, c. 7 et 8. Summa earum est, quia in hoc metu duo possunt considerari: unum est, quod inferatur per injuriam, quod maxime est verum, quando incutitur ad extorquendum consensum in professione; aliud, quod vel tollit, vel nimium minuit libertatem. Primum est quidem verum, et posset fortasse valere ad irritandum contractum cum homine factum, et in tali injurya fundatum, ut multi probabiliter opinantur; tamen respectu Dei hæc injurya nihil facit, quominus promissio, vel traditio illi facta valida sit, tum quia ipse non est auctor talis injuryæ, tum etiam quia si ipse velit malum illud vel timorem inferre aut permittere, ut homo induceretur ad professionem faciendam, jure merito posset id facere. Secundum autem quod ad ablationem libertatis falsum est, quia voluntas non cogitur simpliciter, nec necessitatur ad interiorem consensum, liberumque eset homini velle potius mori quam profiteri. Quoad diminutionem autem libertatis verum est assumptum; tamen inde inferri non potest actum esse nullum ex natura rei, quia nulla sufficienti ratione hactenus probatum est, ad valorem hujus ex natura rei necessarium esse libertatem ita perfectam, ut nullo ex capite minuatur, alias professio facta importunis precebus, vel ex vehementi passione, non esset valida. Accedit plures esse metus non minus minuentes libertatem, de quibus certissimum est non invalidare professionem; hujusmodi est metus mortis naturalis ex infirmitate, vel violentæ ex naufragio. Optimusque casus esse solet de adultera, quam maritus juste vult affici poena mortis, nec pareat nisi religionem profiteatur, quia certissimum est talem professionem esse validam. Idemque censeo si quis, timens violentam mortem sibi imminentem ab inimico, quem ut fugiat, religionem ingreditur, non quia metus in hunc finem immisus sit, sed in odium, vel vindictam alterius rei. In quo casu *Panormitanus* in d. c. *Sicut nobis*, significat professionem esse invalidam, sed immerito, quia nullo jure id probari potest, nec ratione. Quid enim interest respectu Dei, quod talis metus juste incutatur per publicam justitiam, aut injuste per privatam personam? nam sine dubio utroque modo æque minuitur libertas, et ratio injuryæ, ut dixi, impertinens est; ergo ulterius quamvis metus directe inferatur ad extorquendum consensum in professione, non propterea

ex natura rei vel consensus est inefficax, vel professio nulla.

7. *Instantia contra proxime positam confirmationem.* — Responderi potest, quando metus directe incutitur ad extorquendum consensum, esse specialiorem quamdam diminutionem libertatis, quæ non est in quocumque alio metu ex numeratis; nam in aliis non determinatur voluntas ex vi metus ad eligendam professionem, tanquam medium necessarium ad vitandum malum quod timetur; sed cum malum alioquin immineat, voluntas ipsa ex sua libertate se determinat ad eligendum hoc medium, vel ut a Deo imploret auxilium, vel ut securiore vivendi rationem habere possit. At vero quando metus directe incutitur ad extorquendum consensum, voluntas ex vi illius quodammodo determinatur ad eligendam professionem tanquam medium necessarium ad vitandum malum illud, quæ determinatio longe major est, magisque contraria libertati; nam, supposita intentione vitandi illud malum, est quedam necessitas simpliciter. Unde cum homo habeat intrinsecum et naturale jus ad vitandum malum illud, imo etiam voluntas vitandi illud quodammodo naturalis sit, voluntas etiam talis medii non censetur sufficienter libera. Atque ex hac differentia oritur alia ad morales effectus valde notanda; nam quando metus non est directe immisus ad extorquendum consensum, moraliter nulla est occasio faciendi fictam professionem, sed regulariter fit vere, et ex animo, quia hoc modo facta, est medium utile vel ad placandum Deum, vel ad consequendum finem intentum, non autem si ficeret fieret. At vero quando timor est directe immisus ad extorquendum consensum, regulariter est occasio faciendi potius professionem fictam, quam ex vero consensu, quia ipsum externum opus reputatur sufficiens medium ad vitandum periculum.

8. *Responsio ad instantiam.* — Sed, licet hæc differentiae merito consideratae sint, et sint utiles ad intelligendum quare jura non irritant, nec in universum prohibent profesiones ex priori metu factas, summe autem detestatur directas coactiones, et extorsiones professionum, nihilominus non sufficiunt ut propterea dieamus professionem factam ex metu directe immisso esse ex natura rei nullam. Primo, quia tota illa differentia est secundum magis et minus, servata semper libertate simpliciter ita perfecta, ut ad peccandum consensum in professione, non propterea

fundamento dicitur, diminutionem illam, quæ accidentaria semper dici potest, in uno gradu annullare actum ex natura rei, et non in alio; maxime cum pro regula habeatur, libertatem, quæ sufficit ad peccandum mortaliter, sufficere ex natura rei ad votum emitendum. Secundo, quia ex eo potius quod talis professio frequenter fice fit, colligitur ipsum consensum internum non esse medium simpliciter necessarium ad vitandum timorem illum, quia actus externus fice factus sufficeret; solum ergo exigitur ab operante, ne talem externum actum indebito modo faciat, qui est magnus, et perfectus usus libertatis. Tertio, quia ratio supra facta semper retinet vim suam, quæ apud me est maxima, quia talis voluntas potest se obligare, et hic et nunc simpliciter et absolute vult; ergo quantum ex sese, seu ex natura rei, id facit, nisi extrinsecus jure aliquo impediatur. Propter has ergo rationes censeo ex sola rei natura professionem talem non esse invalidam.

9. *Probatur secunda pars resolutionis posita, quod sit irrita jure ecclesiastico.* — Altera vero pars, scilicet, quod jure canonico invalida sit, evidenter sequitur ex prima assertione a nobis posita; nam si professio est invalida, et non jure naturæ, necesse est ut id sit jure canonico, quia nullus aliis modis probabilis excogitari potest. Ipsa autem prima assertio non videtur hactenus sufficienter probata, quia illa jura, quæ adduximus, videntur valide infirmari objectionibus factis. Nihilominus probatur primo ex communi sensu Doctorum, ut citatum est, nam et Sylvester, qui videtur contradicere aliis locis, in verb. *Religio*, 3, q. 11, hanc plane sequitur sententiam. Imo videtur etiam esse communis sensus totius Ecclesiæ, quo hujusmodi profesiones invalidæ judicantur, qui consensus magni ponderis est in hac materia, vel quia consuetudo est optima legum interpres, vel quia, licet illud tale jus non esset scriptum, ex tali sensu communi posset intelligi esse traditum, et usu receptum in Ecclesia. Maximeque confirmari hoc videtur ex Concilio Tridentino, sess. 25, c. 19, de Regulari, ubi sic inquit: *Quicumque regularis pretendat se per vim et metum ingressum esse religionem, aut etiam dicat ante aetatem debitam professum fuisse, aut quid simile, etc.* Ubi clare supponit ex hoc capite invalidam fieri professionem, non solum existimatione Ecclesiæ, sed re ipsa; nam concedit tempus quinquennii ad allegandam hanc nullitatem professionis; item

æquiparat hoc impedimentum cum defectu astatis legitimæ, quem constat esse contra valorem professionis, et addit illam particulam generalem, et quid simile, ut comprehendat omne aliud impedimentum irritans. Denique in hoc sensu servatur in Ecclesia hoc decretum; nam si quis, ante elapsum quinquennium post professionem factam, in ecclesiastico judicio sufficienter probet per metum fuisse coactum ad professionem emitendam, liber ab omni obligatione judicatur. Quod nullo modo fieri deberet, saltem ita simpliciter et absolute, si in sola præsumptione, quod professio fice fuisse facta, sententia fundaretur; debuisse enim Ecclesia explicare modum sententiæ seu libertatis, et onerare conscientiam professi; quod si interius consensit non obstante metu, non potest religionem dimittere, etiamsi ab Ecclesia non cogatur; non autem ita fit, sed simpliciter liber judicatur; ergo sensus est, sive consenserit, sive non, professionem fuisse nullam, eo ipso quod ex metu processit. Atque hæc eadem praxis Ecclesiæ, et mens Concilii Tridentini ostendit hunc esse verum sensum d. c. 1, de His quæ vi, etc. Hinc denique sumitur ratio, ob quam fuit valde expediens Ecclesiam tales profesiones irritas facere, quia non poterat alio modo animarum periculis et necessitatibus sufficienter succurrere; cum enim ipsa non posset convenienter cogere ad professionem servandam eum, qui metu coactus illam fecisset, sed periculum magnum erat, quod multi viri religiosi statum suum non servarent, et ideo convenientissimum fuit talem professionem irritam facere, ita ut in hoc negotio hæc duo convertantur ab Ecclesia, non cogi ad professionem tenendam, et ipsam non obligare.

10. *Instantia.* — Dices: nonne potuisset Ecclesia professionem illam, postquam iuridice probatum fuerit ex metu esse factam, postea irritam facere, etiamsi prius rata fuisse? cur ergo non ita factum est? sæpe enim lex non irritat actum, disponit tamen ut irritetur, quod in præsenti videtur futurum fuisse melius, ut post professionem hoc modo factam nemo posset illam deserere sine sententia et irritatione Ecclesiæ, et interim ad eam servandam vere obligaretur. Respondeo, mea sententia hunc modum fuisse possibilem, tamen res est incerta, et sub opinione, nam multi putant professionem semel ratam non posse per Ecclesiam dissolvi; et hoc satis erat ut Ecclesia modum illum per generalem legem non statueret; maxime, quia si dissolvi

potest, solum est per Summum Pontificem, et ideo nec fuit conveniens ut talis irritatio omnibus judicibus committeretur; nec etiam fuit expediens ut in omnibus similibus causis judicium esset Sedi Apostolicæ reservatum. Melius ergo fuit, præveniendo incommoda, talem professionem irritare, et per hæc sufficienter, ut existimo, satisfactum est aliarum opinionum fundamentis.

11. *Dubitatio quinam metus annulet professionem.* — *Differentia et explicatio metus levis et gravis.* — Statim vero occurrit inquirendum de quo metu intelligendum hoc sit. Potest enim esse vel gravis, vel levis. Prior appellatur communiter cadens in constantem virum, quia talis tantusque est, ut vir etiam fortis et constans illo moveri possit. Aliqui vero declarant, illum esse metum cadentem in virum constantem, cui vir constans cedit, ut aliquod malum faciat; quo sensu nullus metus etiam mortis aërbissimæ cadit in virum constantem, quod tamen falsum est. Item, quia alias si quis faceret professionem fietam ex metu mortis, ille non esset metus cadens in virum constantem; si autem faceret professionem veram, quantum est ex se, esset metus cadens in constantem virum; quia prior ex metu fecit aliquod malum; posterior vero minime; at hoc falsum est, cum sit metus æque gravis. Non est ergo hæc circumstantia explicanda per respectum ad opus seu ad subjectum, sed per respectum ad objectum seu malum quod timetur, quod tam grave est, quod merito vir fortis timere potest, non ut ob illud vitandum aliquid ex se malum faciat, hoc enim propter nullum metum licet; sed quod merito illud timere potest, et fugere, fugiendo talem actum, ut est in præsenti professio. Quod autem malum censendum sit ita grave, ut ad hunc metum sufficiat, fere iudicio prudentis arbitrandum est, argumento 1. *Metus*, ff. Quibus ex causis, etc., licet in dict. c. *Cum dilectus*, de His quæ vi, dicatur non obstat violentiam, quæ metum mortis aut cruciatum corporis non continet; nihilominus, ut glossa ibi et omnes advertunt, non tantum illa duo sufficiunt ad hunc metum gravem; tamen ex illis sumitur regula, ut omne malum moraliter æquivalens sufficiat, ut diuturnus carcer, verbera, vel ignominiosa, vel acerba; item gravis infamia, vel honoris jactura, quam homines præferunt corporis incommodis, et similia. Sed, ut brevius et generalius res explicetur, dico metum, ut dicatur cadere in virum constantem, duo prærequiri: et

quod malum, quod timetur, sit grave, iudicio prudentum; et quod gravi seu probabili ratione timeatur tanquam imminens. Quæ autem mala non sunt ita gravia, non sufficiunt ad metum cadentem in constantem virum, propterea levis dicitur. Præter mali vero gravitatem, oportet ut metus etiam sit rationabilis, id est, in vero et morali periculo fundatus, nam vir constans non timet nisi ubi de periculo satis constat; inconstans autem aut levis homo facile trepidat, ubi non est sufficiens ratio timoris. In quo etiam non potest uniformis regula tradi, sed pro capacitate subjecti; aliam enim constantiam requirit recta ratio in viro, quam in femina, et aliam in matura aetate quam in puerili, ut latius tractant Doctores, in materia de matrimonio, et videri possunt Covar., in 4, p. 2, c. 3, § 4; Navar., c. 22, n. 51; Sylvest., verbo *Matrimonium*, 8, q. 11; Soto, in 4, d. 22, q. 1, art. 2, et lib. 7 de *Justitia*, q. 2, art. 1, ad 2; Sanchez, lib. 4 de *Matrim.*, disput. 3.

12. *Objectio.* — In præsenti ergo omnes requirunt metum cadentem in constantem virum, ut professio sit irrita. Et colligitur ex c. 1, de His quæ vi, ubi solum de metu mortis fit mentio, et a fortiori ex c. *Cum dilectus*, ubi metus non gravis quasi nihil reputatur. Omnia etiam jura, quæ in easu matrimonii et similibus de metu irritante loquuntur, et in hunc modum illum explicant, ut patet in c. *Veniens*, 2, et c. *Consultationi*, de Spensalib., et alias dicitur in jure, quod vanus timor non excusat, leg. *Metum*, 2, ff. Quod metus causa, et leg. *Si quis ab alio*, ff. de *Re judie*. Et ratio est, quia metus levis non immutat multum voluntatem, et consequenter non diminuit notabiliter libertatem ejus. Dices: etiamsi fortasse malum in se grave non sit, aut periculum in re non immineat, si in apprehensione operantis ut talia judicentur, non minus movent quam si in re existerent; ergo non minus libertatem minuant; ergo non minus impediunt valorem professionis. Et e converso, licet malum sit grave, et vere imminens, non tamen apprehendatur ut tale; vel licet apprehendatur, non tamen multum moveat, quia ex fortitudine operantis simul apprehenditur ut superabile, tunc metus parum diminuet libertatem; tunc ergo non irritabit actum. Circa hoc Navarr., in *Summa*, c. 17, n. 30, et c. 22, n. 51, vers. *Septimum*, et consil. 9, de His quæ vi, indicat illam distinctionem metum solum procedere in foro exteriori, nam in foro conscientiae putat expendendum esse